


S.
I
89

YAM QUAM SIEN
IMPUGNATIO RELIG.
CHRIST. ET ASTRON.
EUROP.





天學傳槩

Libellus de lego diuina
a quo yam quam siem sumpsit
exordium Iud Accusationis
contra P Adamum Schal.
Socet Jefu.

Vt i potest ex memoriali ab
accusatore oblate.

Hoc exemplar est conforme exemplari
impresso, quo Pekini servatur. Tabulis
primis in persecutione exustis.
Ista Tchou Pekini 5^o Nov. 1701.

Antonius Thomas
Vice-proudl Socet Jefu
Vice-Proudl Sinensis.



Gf Verbiest: Taf. Sin II 43.
45, 2, 3, Taf. Sin I. 54, 55.

Yam quam sien ch. chieh tel.
et astro. Europ. Taf. Sin I 89.

序

自天地之心見而後君師之道
興帝王之所以爲治聖賢之所
以爲學未有不本乎天者也黃
軒迄今世無異治而教統一裂
人自爲學家自爲師若水火之



不相謀要無不尊天以立說者
一彼一此之間往往陽擯其名
而陰竊其實雖道家之幽渺釋
子之虛寂窮其所托與吾儒之
盡性至命不有殊途而同歸者
乎惟是數倫毀紀舍君臣父子

之大而耽夫幽渺虛寂以別求
其所謂天此二氏之教吾儒所
以辭而闢之也彼行之不著習
矣不察終其身於君臣父子而
莫識其所爲天卽儒者或不能
無弊如欲循其弊以爲救仍莫

若尊天以立說相傳開闢以來
有所爲天主教學者驟而聆其
語若倘悅而弗可據卽其於吾
儒當告之以二帝三王之道日
月星辰之行天地之所以著鬼
神之所以幽物類之所以蕃江

河之所以流不應瀆告之以其
學也久之而親其人繹其書以
昭事不墮爲宗旨克己愛人爲
工夫悔過遷善爲入門生死大
事有備無患爲究竟其於二帝
三王之道日月星辰之行天地

之所以著鬼神之所以幽物類
之所以蕃江河之所以流靡弗
相始終相表裏超出乎二氏之
上而後知其學何莫非吾儒之
學也其教自漢唐流傳中土明
萬曆辛巳耶穌會士西泰利子

航海九萬里而來建堂於宣武
門內一時名公卿多樂與之遊
至

國朝恩禮倍渥通微教師實總
曆務復

勅建東堂再可利子景明安子

主之余俱樂與之遊而然真李
子以余爲有辨乎其言也持所
著書屬利子索余序因述其大
畧惟向者福清葉相國贈西賢
詩有云言慕中華風深辨吾儒
理又云拘儒徒管窺達觀自一

視誠化其同異之見取所爲尊
天以立說者究其指歸精其義
蘊卽不言學並不言教可也而
一切窮神達化更有進乎此者
抑非余之所及知也已

康熙三年歲在甲辰春王正月



柱下史毘陵許之漸敬題



天學傳槩



燕吳後學李祖白撰

天學天主教學也天主爲萬有之初有其有無元而爲萬有元德福圓滿知能渾全妙性超然奧窮思悟中土尊稱之曰上帝茲以其爲天地之主宰故質稱天主也而其教則爲人而立別人於蠢動儕人於天神令向真原而求真福大要以昭事不墮爲宗旨以克己愛人爲工夫以悔過遷善爲入門以生死大事有備無患爲究竟誠吾人最嚙累之實學而其從來

遠矣緬昔天主上帝於厥世始開闢乾坤發育萬物
所以資人安居利用者悉備而生初人男女各一其
靈性賦以當然之則好善惡惡秉爲彝常永不能脫
凡遇忠孝大節舉仰慕之若渴凡遇奸頑大憲舉疾
視之若讐自古稱爲性教愚非不足聖非有餘豈不
然乎祗以性參氣稟物誘交侵失其初良而不敢漫
言率也則繼之以書教後開闢三千七百有一年天
主於西納山西距中國四萬里頂降石碑二明列十誡爲目
括以愛主愛人爲綱是書教者所以爲性教之申命

也而不惟是又後千四百九十七年天主之教世又有進焉者先是詔示人間兼遣神人此因舉世況迷
躬自降救下取人性以接本性而生如德亞國初人于此西納山亦生在其界內之白稜郡名耶穌在世三十有三載所
顯奇跡甚衆命死者活卽活命瞽者見卽見巨浪雄
風命息卽息虐魔恣害命退卽退蓋與化成功用萬
有應命而出者同一神異也詳明誠理簡定新規羣
心大服名其教爲寵教以見教由主寵非人分所應
有云較前性書二教恩施此尤摯矣然則天學之傳

及中土其時亦可得而稽乎曰有斯人卽有斯教中土人與教同時並得也何以言之方開闢時初人子孫聚處如德亞此外東西南北並無人居當是時事一主奉一教紛岐和說無自而生其後生齒日繁散走遐逖而大東大西有人之始其時畧同考之史冊推以歷年在中國爲伏羲氏卽非伏羲亦必先伏羲不遠爲中國有人之始矣惟此中國之初人實如德亞之苗裔自西徂東天學固其所懷來也生長子孫家傳戶習此時此學之在中國必倍昌明於今之世

延至唐虞下迄三代君臣告戒於朝聖賢垂訓於後徃徃呼天稱帝以相警勵夫有所受之也豈偶然哉其見之書曰昭受上帝天其申命用休曰予畏上帝不敢不正曰惟皇上帝降衷于下民曰上帝妥佑下民曰惟簡在上帝之心曰惟上帝不常作善降之百祥作不善降之百殃曰顧諟天之明命曰天佑下民作之君作之師惟其克相上帝曰我亦不敢寧於上帝命弗永遠念天威見之詩曰文王在上於昭于天文王陟降在帝左右曰維此文王翼翼昭事上帝天

鑒在下有命旣集上帝臨汝無貳爾心曰皇矣上帝
臨下有赫曰敬天之怒無敢戲豫敬天之渝無敢馳
驅曰蕩蕩上帝下民之辟天生蒸民其民匪諶曰貽
我來牟上帝率育曰赫赫姜嫄其德不同上帝是依
無貳無虞上帝臨汝魯論曰獲罪於天無所禱也曰
予所否者天厭之天厭之曰立之禱久矣曰畏天命
中庸曰郊社之禮所以事上帝也曰上天之載無聲
無臭至矣孟子曰樂天者保天下畏天者保其國曰
順天者存逆天者亡曰雖有惡人齋戒沐浴則可以

事上帝曰存其心養其性所以事天也歟壽不貳修
身以俟之所以立命也凡此諸文何莫非天學之微
言法語乎其不但言帝又言天者天卽帝也猶臣民
間稱君上爲朝廷朝廷卽君上也審是則中國之教
無先天學者惜乎三代而還世風日下民生苦於戰
爭士習壞於功利呂秦代周任法律棄詩書從前載
籍盡遭烈焰而天學不復覩其詳矣傷哉逮至西漢
元壽天主降生及救世畢宗徒聖多默者行教中土
事載西史而此中中州近地明季流傳十字教規緣



天主救世功成十字故以名教是卽多默所遺教也
逮至有唐貞觀九年上朔天主降生六百三十五禩
大秦國卽如德亞國修士阿羅本遠將經像重譯來朝爾
乃宰相郊迎翻經內殿命名景教初勅造大秦寺於
京後又徧勅諸州各置景寺開元以後四朝寵賚彌
渥卽郭汾陽王亦復重廣法堂依仁施利修舉哀矜
教行有唐益二百載而近矣今長安有景教流行中
國碑可考也又後九百四十六載遡天主降生十五
百八十一年爲明萬曆辛巳耶穌會士西泰利子自

歐羅巴梯航九萬里東來庚子底燕京貢聖像西琴
自鳴鍾等物朝廷義隆柔遠恩禮備至縉紳先生與
之遊講究天主大道多所契合著有實義畸人等書
行世服從其教感其化者比比辛亥卒於京賜地葬
焉於是熊麗陽龍諸子先後接踵來京司教事而晉
有高則聖閩有艾思及江南有畢今梁並顯聞於時
崇禎己巳庭議修曆徐文定公素折節西賢爲性命
交知其旁通曆學時以少宗伯領督修疏薦函璞鄧
子未幾病歿續薦余師道未湯子暨味韶羅子曆垂

成羅又病歿獨余師與曆事相始終入

國朝用其法造時憲曆頒行天下

命掌欽天篆辭再三不允至辛卯遂荷

世祖皇帝特達之恩眷錫嘉名晉崇階更念其將老

勅戶部查給地畝任作生墳而且

駕數臨堂諮詢教學賜

御製文有銘西泰氏舊堂之東偏師爲倣西式改創新

堂寬數倍於其東階恭勒

綸音於石以垂不朽天下聞而榮之堂近宣武門屬城

西東華門舊燈市之南又一堂

欽賜於順治乙未改建於康熙壬寅堂亦西式相偕在
內行教者再可利子景明安子也人稱東堂以別于
宣武門之堂天學之在京師爲四方之望自京師堂
構一新叨

恩格外而四方西賢鐸振之地士民益奮欽崇會有中
丞匯白佟廉察鶴沙許二公信嚮綦堅宦遊所到捐
貲營築以奉天主俸入不爲已有而爲天主有其視
明葉文忠徐文定韓蒲州劉成都李岡卿楊京兆數

君子樂爲道侶身主者又何讓乎江南之蘇松二郡
浙之武林江右之南昌之建昌之南贛楚之武昌閩
之福州之建寧之延平之汀州蜀之重慶之保寧咸
有新堂西賢居焉前已丑余師爲曆學計久遠特疏
上請敦伯南子以知曆赴闕庭仰給大官同時遵
旨入内地者又十餘人我

國家肇造區夏一統無外名公鉅卿相與黼黻

皇猷於上而輦轂內外或省會之衝或鄉邑之僻每有
西賢至止時出其所學爲世津梁指正真之定極杜

誑惑之旁蹊於以下肅人心上襄

王化唐虞三代之風庶其再見於今日歟利西泰而下

著述號最富者進呈曆書百餘卷業蒙

宣付史館他若理器殊彙莫非教學攸關成書又三百

卷有經有史有超形性學有形性學有修學
有天文學板藏京師江南浙閩秦晉各堂且總計

載來圖書七千餘部羣賢感荷

幃帳賓至忘返共矢協佐

同文抑首翻譯川至日升殆無窮竟鳴呼此又秦火以

前未有之盛事也漢唐無論矣癸卯孟冬公餘少暇

客有問天學今昔之概者謹遵所聞論次之以代口

荅



